

आकाशवाणी रायपुर (छत्तीसगढ़)

प्रादेशिक समाचार बुलेटिन

(छत्तीसगढ़ी)

18.10 रविवार

दिनांक 22.09.2024

प्रमुख समाचार –

- 1- प्रधानमंत्री जनजातीय उन्नत ग्राम अभियान म छत्तीसगढ़ के आदिवासी बहुल छै हजार छै सौ इंक्यानवे गांव के करे जाही काया-कल्प।
- 2- बीजापुर अउ दंतेवाड़ा जिला म बारह झिन इनामी माओवादी मन ह पुलिस के आगू करीन आत्मसमर्पण
- 3- प्रदेश के बस्तर कोंडागांव, दंतेवाड़ा, सुकमा अउ बीजापुर जिला म एक-दू जघा म भारी बरसा होय के हवय संभावना

प्रधानमंत्री जनजातीय उन्नत ग्राम अभियान

प्रधानमंत्री जनजातीय उन्नत ग्राम अभियान म छत्तीसगढ़ के आदिवासी बहुल छै हजार छै सौ इंक्यानवे गांव के काया-कल्प करे जाही। ए अभियान म आदिवासी परिवार के सामाजिक आर्थिक विकास के संगेसंग गांव म आने जरूरी सुधार घलो होही। मुख्यमंत्री विष्णुदेव साय ह केंद्र सरकार के ए योजना ल राज्य म बने ढंग ले चलाय के निरदेस दीन।

राष्ट्रपति-मुलाकात

नई दिल्ली के राष्ट्रपति भवन म काली राष्ट्रपति द्रौपदी मुर्मू ले बस्तर के माओवाद हिंसा ले पीड़ित लोगन मन भेंट करीन। ए दौरान पीड़ित मन ह राष्ट्रपति ल बतइन कि कइसे माओवादी हमला ह उंखर जिनगी ल तबाह कर देहे। राष्ट्रपति ह पीड़ित मनके दुख ल सुनिन अउ भरोसा देवाइन कि केंद्र सरकार बस्तर म सांति अउ विकास बर हर संभव काम करही। प्रतिनिधि मंडल ह राष्ट्रपति ल बतइन कि छत्तीसगढ़ के मुख्यमंत्री विष्णुदेव साय के अगुवई म बस्तर क्षेत्र म सांति बहाली अउ विकास खातिर कतकोन काम करे जात हे। बस्तर म माओवाद उन्मूलन बर प्रभावी काम होवत हे। उहें, लोगन ल शिक्षा, स्वास्थ्य अउ रोजगार जइसन जरूरी सुविधा देवाय जात हे। मुख्यमंत्री कोति ले सुरू करे गे योजना ले बस्तर के लोगन म एक नवा उछाह जागे हे।

लोक अदालत

छत्तीसगढ़ के सबो जिला अउ सत्र न्यायालय म काली राष्ट्रीय लोक अदालत लगाय गीस, जेमा आठ लाख चौरासी हजार ले जादा प्रकरण के निवारण होइस। उहें दू सौ उनतीस करोड़ रुपिया ले जादा के अवाई पारित करे गीस। राष्ट्रीय लोक अदालत म सुकमा जिला म बाढ़ के सेति पक्षकार जिला न्यायालय तक नहीं पहुंच सकिन, ओ पक्षकार मन ल वीडियो कान्फ्रेंसिंग के माध्यम ले जोड़के प्रकरण म राजीनामा के आधार म निराकरण करे गीस। तेईस जिला अउ सत्र न्यायालय म राखेगे लोक अदालत के छत्तीसगढ़ उच्च न्यायालय के मुख्य न्यायाधीश रमेश सिन्हा ह वर्चुअल जुड़के कार्रवाही के निरीक्षण करीन। ए दौरान मुख्य न्यायाधीश ह सबो जिला के प्रधान जिला न्यायाधीश अउ आने खंडपीठ के पीठासीन अधिकारी मन ले गोठबात करीन अउ जादा ले जादा प्रकरण के निपटारा करे बर प्रोत्साहित करीन। उहें, मुख्य न्यायाधीश ह बिलासपुर म लोक अदालत बर गठित दूनो खंडपीठ के भ्रमण करीन।

नगरीय निकाय-निरीक्षण

नगरीय प्रशासन विभाग के संचालक कुंदन कुमार ह कुम्हारी नगर पालिका, भिलाई-चरोदा अउ रिसाली नगर निगम के दउरा करके काम के समीक्षा करीन। ओमन तीनो नगरीय निकाय म ओबीसी सर्वे काम के घलो निरीक्षण करीन। ए दौरान ओमन निकाय के कार्य प्रणाली म कमी मिले अउ सर्वे काम के बढ़वार संतोषजनक नइ पाय जाय म सीएमओ अउ संबंधित प्रभारी लिपिक मन ल नोटिस जारी करीन। संगेसंग प्रभारी कार्यपालन अभियंता ल अनुपस्थित पाय जाय म नोटिस जारी करीन।

उपमुख्यमंत्री कवर्धा

उप मुख्यमंत्री अरूण साव अउ विजय शर्मा काली कबीरधाम जिला के लोहरीडीह गांव पहुंचिन। ए दौरान ओमन मउत होय प्रशांत साहू के घर जाके परिवार वाले मनले भेंट करीन अउ उंखर मा ल दस लाख रुपिया के चेक सौंपिन। ओमन गांव वाले मन ले गोठबात करत घटना के जानकारी लीन अउ दोषी मन उपर कड़ा कार्रवाही करे के भरोसा देवाइन अउ लोगन ले सांति बनाय राखे के अपील करीन। ए मउका म राजस्व मंत्री टंकराम वर्मा, विधायक भावना बोहरा अउ साहू समाज के बड़का पदाधिकारी मौजूद रिहीन।

माओवादी—आत्मसमर्पण

बीजापुर अउ दंतेवाड़ा जिला म बारह झिन माओवादी मन ह पुलिस के आगू आत्मसमर्पण करीन हे। ए सबो माओवादी मन ल राज्य सरकार के पुर्नवास नीति म पच्चीस—पच्चीस हजार रुपिया के सहायता रासि दे गीस। बीजापुर जिला के आने—आने थाना क्षेत्र के सक्रिय तीन इनामी समेत आठ माओवादी मन ह आत्मसमर्पण करीन हे। एमा एक झिन उपर आठ लाख दूसर उपर दू लाख अउ एक आने माओवादी उपर एक लाख रुपिया के इनाम घोसित रिहीस।

उहें, दंतेवाड़ा जिला म एक माओवादी दंपत्ति समेत दू आने महिला माओवादी मन ह आत्मसमर्पण करीन हे। ए चारो उपर बीस लाख रुपिया के इनाम घोसित रिहीस। जिला के पुलिस अधीक्षक गौरव राय ह बतइन कि आत्मसमर्पण करइया माओवादी दंपत्ति उपर आठ—आठ लाख रुपिया के इनाम घोसित रिहीस से अउ ए रीजनल कंपनी नंबर दू के सदस्य के रूप म सक्रिय रिहीन। एखर संगेसंग एक आने महिला माओवादी उपर तीन लाख अउ जगरगुंडा एरिया कमेटी के महिला संगठन के अध्यक्ष उपर एक लाख रुपिया के इनाम घोसित रिहीस।

तीजन बाई—स्वास्थ्य

पद्म विभूषण पंडवाणी गायिका तीजन बाई पाछू कुछेक दिन ले बीमार चलत हे, उंखर स्वास्थ्य ल लेके मुख्यमंत्री विष्णुदेव साय ह डॉक्टर मन ल बने इलाज के निरदेस दीन हे। स्वास्थ्य विभाग के डॉक्टर मनके दल दुरूग जिला के गांव गनियारी म उंखर घर म रोजे स्वास्थ्य जांच करत हे।

सीआरपीएफ—ट्रक हादसा

बस्तर जिला के बास्तानार घाट म आज केंद्रीय रिजर्व पुलिस बल सीआरपीएफ के जवान मन ल लेके जावत एक ट्रक ह अंते—तंते होके पलट गे। ए हादसा म तीन जवान मन ल मामूली चोट आय हे, जउन मन ल प्राथमिक उपचार बर गिदम अस्पताल भेजे गीस, जिहां स्थिति सामान्य बताय जात हे। ए ट्रक म बीस झिन जवान बइठे रिहीन अउ ए सबो दोरनापाल ले बारसूर कोति जात रिहीन हे।

प्रभारी आयुक्त—बैठक

आदिम जाति अउ अनुसूचित जाति विभाग के प्रभारी आयुक्त संजय गौड़ ह वीडियो कान्फ्रेंसिंग ले आने—आने जिला के सहायक आयुक्त के बइठका लेके आश्रम, छात्रावास के स्थिति के जांच करीन अउ अधिकारी मन ल जरूरी दिसा निरदेस दीन। ओमन किहीन कि आश्रम छात्रावास म पढ़इया लइका मनके हित अउ सुरक्षा ल धियान म राखत काम करे जाना चाही।

प्रशिक्षण कार्यक्रम

नवा रईपुर के राजीव गांधी राष्ट्रीय भूमिजल प्रशिक्षण अउ अनुसंधान संस्था म काली तेईस सितंबर ले चार अक्टूबर तक भूमि अउ सतही जल प्रबंधन म अंतर्राष्ट्रीय प्रशिक्षण कारीकरम राखे जाही। कारीकरम के सुरुआत म एएआरडीओ के सचिव जनरल डॉक्टर मनोज नरदेव सिंह अउ केंद्रीय भूमि जल मंडल के अध्यक्ष डॉक्टर एस. के. अम्बस्ट माई पहूना के रूप म संघरही। ए कारीकरम अफ्रीकी—एशियाई ग्रामीण विकास संगठन संग मिलके करे जाही, जेखर उद्देश्य सदस्य देस के वैज्ञानिक अउ संगठन क्षमता ल बढ़ाना हे।

पंचायत ग्रामीण विकास विभाग भर्ती

राज्य सरकार ह पंचायत अउ ग्रामीण विकास विभाग म खाली पद म भर्ती के प्रस्ताव ल मंजूरी दे देहे। एमा राष्ट्रीय आजीविका मिसन म दू सौ सैंतीस पद म भर्ती करे जाही। एमा राज्य स्तर के नौ अउ जिला स्तर के दू सौ अट्ठाइस पद सामिल हे। ए पद म भर्ती होय ले राष्ट्रीय आजीविका मिसन के योजना ल परभावी ढंग ले लागू करे जा सकही।

“मोदी ह तो संभव है” पुस्तक

मुख्यमंत्री विष्णुदेव साय ह रईपुर के अपन निवास कार्यालय म सुप्रसिध्द साहित्यकार अउ गीतकार रामेश्वर दास वैष्णव कोति ले रचित किताब “मोदी है तो संभव है” के विमोचन करीन। ए किताब म प्रधानमंत्री नरेंद्र मोदी के उपलब्धी ल अलगे अंदाज म मुक्तक के माध्यम ले प्रस्तुत करे गेहे। ए मउका म मुख्यमंत्री ह किहीन कि श्री मोदी के कार्यकाल म हरेक क्षेत्र म ऐतिहासिक काम होय हे। ए मउका म मुख्यमंत्री ह किहीन कि श्री मोदी के कार्यकाल म हरेक क्षेत्र म ऐतिहासिक काम होय हे। संगेसंग देस के सबो वरग के विकास होय हे। अइसन म ओमन साहित्यिक रचना खातिर पुस्तक के लेखक ल बधई अउ सुभकामना दीन हे।

फॉरेस्ट स्पोर्ट्स मीट

छत्तीसगढ़ वन विभाग कोति ले ऑल इंडिया फॉरेस्ट स्पोर्ट्स मीट के आयोजन करे जाही, जेखर तियारी सुरु होगे हे। रईपुर म होवइया ए स्पोर्ट्स मीट म देस भर ले वन विभाग के अधिकारी अउ करमचारी भाग लीही अउ ए दौरान ढाई सौ ले जादा खेल प्रतियोगिता होही। स्पोर्ट्स मीट म ऐथलेटिक्स, बैडमिंटन, बास्केटबॉल, हॉकी फुटबॉल, लॉन टेनिस, वॉलीबॉल, क्रिकेट अउ टेबल टेनिस जइसन बीस ले जादा खेल म प्रतिभागी मनके बीच प्रतियोगिता देखे बर मिलही।

प्रधानमंत्री विशेष कार्यक्रम

प्रधानमंत्री नरेंद्र मोदी के अगुवई म केंद्र के एनडीए सरकार के तीसर कार्यकाल के सौ दिन पूरा होय म आकासवाणी रायपुर ले आज संझा सात बजे “विशेष कार्यक्रम” के प्रसारण करे जाही। ए कारीकरम के निर्माण प्रादेशिक समाचार एकांश ह करे हे।

मौसम

मौसम बिभाग ले मिले जानबा के मुताबिक अइवया चौबीस घंटा के दउरान प्रदेस के बस्तर, कोंडागांव, दंतेवाड़ा, सुकमा अउ बीजापुर जिला के एक-दू जघा म भारी बरसा होय के संभावना है। उहें, एक-दू जघा म मध्यम से भारी बरसा हो सकथे। इहीं बीच, रईपुर समेत कई ठिन जिला मन म आज मंझनिया बाद बरसा होईस, जेखर ले लोगन मन ल उमस अउ गरमी से थोड़किन राहत मिले हे।
